



ज्वजलपा वा:पौ

JWOJALAPA WEEKLY

दैं ७ ल्या: ४३ (पूर्णडक १४५) ने. सं. ११३७ तछलागा नवमि आइतवा: २०७४ असार ०४ गते आइतवार (Jun- 18, 2017)

मू द १- पृष्ठ ६

नेवा: एफ एम व्यवस्थित कथं न्ह्याकेगु तयारी



किपूया द्य:ध्वाखा लागाय् टावर
तया परिक्षण प्रशारण
किपूया फुक्क लाग्ना नापं
स्वनिग:या फुक्क थासं न्यनेफइगु

ज्वजलपा वा:पौ /

जनस्तरं पलिस्था यानात:गु छगू जक एकेडेमि किपूया नेपालभाषा एकेडेमिपाखें संचालन याना त:भुखाय् लिपानिसें दिना समस्या जुयाच्वंगु नेवा:तयगु गौरव जुयाच्वंगु नेवा: एफ एम आ: व्यवस्थित रुपं संचालनया नितिं तयारी या:गु दु ।

नेवा: एफ एम १०६ दशमलव ६ मेगाहर्जयात व्यवस्थित रुपं न्ह्याकेगु तयारीया भुवलय् एफ एमया टावर किपूया द्य:ध्वाखा लागाय् तया परिक्षण प्रशारणया रुपय् ज्या न्ह्याकूगु दु । थीथी संचार माध्यमय् ज्या यानाच्वपिं किपूया संचारक:मि नापं नेवा: भाय्, नेवा: संस्कृति नापं नेवा: न्हयलुवातयगु मंका: कुतलं उगु कथं एफ एमयात व्यवस्थित रुपं न्ह्याकेगु ज्याया अन्तिम तयारी या:गु दु ।

नेपालभाषा एकेडेमिलिसे छगू कथंया सम्झौता हे याना नेवा: एफ एम न्ह्याकेगु पुरा हे भाला कायेगु नितिं अन्तिम तयारीइ थ्यंगु दु । निगुलिं पक्ष मौखिक रुपं सहमति जुइ धुंकूगु दुसा छुं दिया दुने हे सम्झौता जुइ धका: नं धा:गु दु । नेवा: भासं जक संचालन जुइगु छगू जक एफ एम नेवा: एफ एम द्य:ध्वाखा लागाय् तया प्रशारण सुरु यायेवं किपूया फुक्क लाग्ना बांलाक हे तायेदुगु व स्वनिग:या फुक्क थासं तायेदत धका: धा:गु दु ।

न्हापा नेपालभाषा एकेडेमि दुगु लाग्ना न्याम्हासिमा लागाय् हे टावर तया संचालन या:गु अवस्थाय् अप्प:सिनं नेवा: एफ एम तायेमदु धका: धायेगु याना वयाच्वंगु ख:सा आ: धा:सा स्वनिग:या फुक्क धाइथें थासं ताये दत धा:गु दु । वंगु विहिवा:निसें परिक्षण प्रशारणया रुपय् नेवा: भाय्या म्ये जक हायेकेगु यानाच्वंगु दु ।

सुथय् ६ बजेनिसें बहनी ७ बजे तक आ:या नितिं नेवा: एफ एम परिक्षण प्रशारणया रुपय् संचालन जुयाच्वंगु दुसा कन्हय् वना १८ घण्टा तक संचालन जुइ धा:गु दु । विशेष याना किपूया युवातयत्त हे थाय् बिइगु कथं उगु एफ एम संचालन यायेत्यंगु ख: ।

उकिया नितिं मा:गु कथंया तालिम तक बिइगु तयारी यानाच्वंगु दु । एफ एम गुगु कथं संचालन यायेगु ? एफ एमय् गज्ज:गु ज्याभुव:त दुथ्याकेगु धइगु खँय् किपूया बुद्धिजीवी, समाजसेवी, भाषासेवीनिसें जनप्रतिनिधितलिसें नं व्यापक रुपं सहलह ब्याकेगु नापं सकल किपूमितयगु हे ख्वालि कया नेवा:तयगु गौरव जुयाच्वंगु नेवा: एफ एमयात किपूमितयसं हे नेतृत्व यायेगु कथंया कुत: यानाच्वंगु ख: । थुगु खँय् नेपालभाषा एकेडेमि तसकं सकारात्मक जूगु दु ।

किपूमि युवातयत्त व:गु अवसर

- नेवा: एफ एमया ज्याभुव: न्ह्याकामि जुइत
- एफ एमया प्राविधिक जुइत
- बजार व्यवस्थापक जुइत

स्वापू तयादिसं

ज्वजलपा वा:पौ व कीर्तिपुर सन्देश

साप्ताहिक फोन नं. ४३३३००७

९८४१४०१०७७ व ९८४१७५२५८३





ज्वजलपा वा:पौ

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

सम्पादकिय

नेवा: एफ एम संचालनया खँय्

नेपालभाषा एकेडेमिया १०६ दबमलब ६ मेगाहर्जया नेवा: एफ एम आ: हाकन संचालनय् वःगु तसकं लसताया खँ खः । उकिसन किपूया संचारक:मि व नेवा: नुग: दुपिन्स संचालन यायेगु धका: भाला का:गु धइगु गुगु कथं खँ वल व भन हे लसताया खँ खः । हरेक ख्यलय् नेतृत्वदायी भूमिका भित्तेत सफल जुयाच्चीपिं नेवा:त आ: वया संचार जगतय् न नेवा: समुदाय दुने नेतृत्वदायी भूमिका भित्तेत सफल जुइत्यंगु दु धइगु उदाहरण नेवा: एफ एम संचालनया जुया बिउगु दु ।

त:भुखाय् व्वये धुसानिसे समस्या जुयाच्चंगु अले गबले संचालन जूगु अले गबले संचालन मजुयाच्चंगु नाप लिपांगु इलय् बन्द जुया सकल नेवा:तय्सं नेवा: एफ एमया बारे न्हयस: तयाच्चंगु इलय् गुगु कथं किपूमितय्सं एफ एम न्ह्याकेगु आँट याना भाला कायेगु ज्या यात थ्व छगू कथं नेतृत्वया भाला नाप नाप चुनौति न खः ।

प्यंगू दर्जनसिबे अप्व: स्विगलय् एफ एम संचालन जुयाच्चंगु अवस्थाय् मुक्कं नेवा: भासं हे संचालन जुइगु थःगु हे कथंया म्हसीका दुगु नेवा: समुदायया गौरव जुयाच्चंगु नेवा: एफ एम संचालन यायेगु भाला का:गु किपूया संचारक:मि नाप नेवा: नुग: दुपिनिगु नितिं जक मखु स्वयं फुक्क किपूमितयगु नितिं न छगू कथंया बांला:गु ज्या खः । चुनौति नाप नाप अवसर न वइ धइगु उदाहरण जुयाबिउगु नेवा: एफ एम संचालनया नितिं किपूया बुद्धिजीवी, भाषिक कार्यकर्ता, जनप्रतिनिधि, संचारक:मिनिसे सर्वसाधारणतयगु नितिं न बांला:गु ज्या खः । अझ विशेष याना युवातयगु नितिं छगू कथं अवसर जुइगु संभावना दु । उकिं सकल किपूमिपिन्सं थुगु एफ एम संचालनया नितिं आ: मंका: कथं न्ह्या: वनेमा:गु आवश्यकता दु ।

गजल शौरभ शाक्यया

गजल-३५



आ:न ईलं लानि न्हाँ, म्हा:छता धायेमते
सितिकं बिल धका:, सुयांगु छुं कायेमते ।
मनूतयगु बानी ख:, थ: त:धं छुना खँ ल्हायेगु
सुनां थायमाच्च:गयेकेवं हे, थ: त:धं तायेमते ।
चकंगु सर्गतय् छक्कलं, सुपाँयनं त्वपू वयेफु
जीवनयात जूया खालय् , गुवसं पायमते ।
गुलाफ स्वांया दँय्, कँ दइच्चनि तिं स्वाना
कँ खना:ग्याना, गुलाफया नस्वां बायमते ।
थ:गु देश, थ:गु भाय् य:यकेमा: थम्ह:मांथें
सुनानं मभिँ मति त:सा, जायेत ग्यायेमते ।

छव्युला नया: क्यान्सर जुइ ला



रोशन श्रेष्ठ

छव्युला दयेकेगु खँ जूवलय् छम्ह
पासां धयादिल -‘थौं कन्हय् न्हापा थें
छुया: छव्युला दयेकिईपिं मदयेधुकल ।
मना: वा पायनय् पुका: छव्युला
दयेकिइ । छुया: दयेकिइगु छव्युला मनी
धका: धाइ ।’

अथे हे मेम्ह पासां धयादिल-
‘छव्युला नाप सावधान, क्यान्सर जुइगु
तत्व दयेफु न्हाँ ।’

अथे ला भी नेवा:त छव्युला सिक्क
य:पिं । देय् मेपिन्सं लाका यंकुसा यंकेमा,
थ: जुजुपिं बिस्व वंसा वनेमा, भीत
छव्युला वजि नया: थ्व त्वना रहरबर
याये दयेवं गा: हँ धका इतिहासय् व्वंका:
त:गु दु ।

त:धं चीधं छुं न भ्वजय् छव्युला
मदयेक मगा: । गुलि ज्याखँय् ला
छव्युला बुकेया नितिं छन्हु अलग हे
‘छव्युला बु’ भ्वय् न्यायेके मा:पिं भी
नेवा:त । अपाय्च महत्वं जा:गु
छव्युलायात थथे ‘मनी’ धका: त्व:तेगु
वा ‘क्यान्सर जुइ न्हाँ, नयेमते’ धयागु
खँ वइच्चन । थ्व धात्थें ख:ला ? ख:सा
भीसं छव्युलाया विकल्प मालेमाल ।
मखुसा थ्व बारे यथार्थ खँ कनेमाल ।

सन २००० य् जापान चनाबलय्
जापानय् क्यान्सर जुया सिईपिनि ल्या:
५ म्हाय् ३ म्ह धका: छन्हु बुखँय् वल ।
दकलय् अप्व: प्वाथय्या क्यान्सर हँ,
अनं लिपा दुरया क्यान्सर, अनं लिपा
स्वँया क्यान्सर हँ धा:बलय् जि अजु
चाल । जापानिजत वं वं थाय् फ्वाँय्
फ्वाँय् चुरोट त्वनेमा:पिं जुया स्वँया
क्यान्सर अप्व: जुइ धैगु जिगु अनुमान,
तर प्वाथय्या क्यान्सर अप्व: ।

जापानिजत तस्कं स्वस्थकर नसा
नयेमा:पिं, समुद्रया थीथी भा:या नोरि,
न्याँ, निसें इमिगु हरेक नसायात विश्व
स्वास्थ्य संघपाखें नं यक्व तारीफ
याइगु । थजा:गु नसा नईपिन्त गथे
जुया प्वाथय्या क्यान्सर जुल जुइ धका:
विचा: यानाबलय् जापानिजतय्सं नइगु
ल ।
खराब ख:ला धका मतिइ वन ।

इमिसं ला भीसं थें नइगु मखु ।
भीसं म्येय्, दुगु व खाया ला अप्व:
नइ । इमिसं सा (दौह), फा, खा व न्या
या ला अप्व: नइ । जापानिजतय्सं नइगु
थी थी ला मध्य कचिकं नइगु ला व
छुया: नइगु ला खराब जुइ फु धका
मतिइ वन । कचिगु ला कचिगु हे
जुल, इमिसं छुया नइबलय् नं बाँलाक्क
बुका: नइमखु । बाबु वंक ला छुया

पिने सिइसे दुने ह्याउंसे च्वना अले
न्त्ययेबलय् रस वइगु जुल कि इमिसं
‘ओइसिइ ने’ (तस्कं सा: खला) धका
नइगु ख: । अर्थात कचिगु ला नया
क्यान्सर अप्व: जुल जुइ धयागु जिगु
शंका ख: ।

छुं ई लिपा हाकनं बुखँ वल, सन
१९५८ निसें संकलन याना त:गु डाटा
पाखें क्यन कि ला छुया नयेगु चलन
यक्व धैगु प्रिफेक्चरया थासय्यापिं मनूत
प्वाथय्या क्यान्सर यक्व जुयाच्चंगु
खनेदत । अले इमिसं ला छुया नयेगु
चलन नाप प्वाथया क्यान्सरया सम्बन्ध
दु धका सन २००१य् लिच्च: पिकाल ।

थ्व खँ सिइवं जिगु ध्यान भीगु
छव्युलापाखे वन । भीगु छव्युला नं
थथे हे खराब जकं मखुला ? भीसं ला
छुया हे छव्युला दयेकेगु ख: । छुया ला
नल कि क्यान्सर जुइगु जूसा छव्युला
नं नये जी मखुत ।

ला छुइबलय् छु जुइ ले ? मिजलं जब
ला क्वाकिइ, अनं लिपा ला:या
रसायन धमाधम हिलावनी । लाबिइ दथुइ
च्वंगु दा: कनावनि । लाय् च्वंगु ल: हा (
बाफ) जुया व्वावनी । लाया
रेसा कयकुना वनी, अथे कयकुनिइबलय्
काप: तिसिथें जुया: लादुनेच्वंगु ल:व्व पिहाँ
वना: ति स्व:स्व: वइ । थथे ल:या व्व:
मदयावनीगु यात लोकल डिहाइडेसन
धाइ । अथे जूगु थासय् च्वंगु ला मिं नया:वइ
। मिं नल कि भीसं ‘ला क्वल, पुइकि’ धका
मि मेथासय् लाकिइ । अथे ला क्वयेक मिं
नइगु थासय् हाइड्रोकार्बन ब्रेकडाउन जुइ ।
अनं कुँ वइ । अनया ला छुफि ह्यंग्वा:थें
हाक्कुसे च्वनी । थथे छुफि ह्यंग्वा: जूइक
हाक्कुसे च्वंक छुया: दयेकिइगु छव्युला हे
‘हाकु छव्युला’ ख: ।

छुया नयेगु ला म्हायात मनी धका:
सिद्धान्त पिहाँ वल -लायात ह्यंग्वा: जुइक
छुलकि अन कार्सिनोजेनिक कम्पाउण्डया
विकास जुइ । थ्व कार्सिनोजेनिक
कम्पाउण्ड धयागु रसायन भीगु म्ह या
DNA यात स्यंकेगु तागत दै । DNA
स्यन कि भीगु म्ह या कोषं थम्हं यायेमा:गु
ज्या यायेमफया वनी । बुलुहँ बुलुहँ व हे
खराबिया कारणं क्यान्सरया विकास जुया
वइ । अथे जुया क्वयेक छुया:त:गु ला
नयेमज्यू ।

तर थ्व सिद्धान्त स्वतन्त्र पुष्टी धा:सा
मजू । ला क्वया ह्यङ्गवा: जुलकि
कार्सिनोजेनिक कम्पाउण्डया विकास
जुइ व उकेंया असर गुकथं लाइ धैगु
थ:हे नं वास्तव्य विवादास्पद जू । अलय्
सम्भाव्यताया दायरा क्व:छिना
प्रोबाबिलिस्टिक एनालाइसिसयात
आधार कया थजा:गु अध्ययन याइगु
जुया लिचल्लय् नं अनिश्चितताया सिमा
(अनसर्टेन्टि मारिजिन) दया च्वनी ।

अर्थात, भीसं क्व:गु ला नया म्हाय्
दुतिनेगु कार्सिनोजेनिक भार गुलि ख:,
गुलि डाइलुट जुइ, गुलि डाइजेस्ट
जुइ ? एक्स रे वा न्यूक्लियर रेडियशन
नं DNA गुलि ध्वस्त याइ धका नापे

याये थें गुलि कार्सिनोजेनिक नसा नल
कि गुलि DNA ध्वस्त जुइ धका नापे
यायेगु प्रविधि मदु ।

प्यदँ ति न्ह्य: थ्व बारे अनुसन्धान
याना जूपिन्सं छता न्हूगु खँ पित हल ।
छुयात:गु लाय् चुरोटया कुँइ धैगु नाप
ज्व:ला:गु पोलिसाइक्लिक हाइड्रोकार्बन
बेन्जोपाइरिन दइगु जुयाच्चन । थ्व
बेन्जोपाइरिन शरिरय् दुहाँ वन कि
जम्मा जुजुं वनीगु जुयाच्चन । अले
बुलुहँ थ्व बेन्जोपाइरिन डाइलोक्साइडय्
हिला वनीगु जुयाच्चन । थ्व बेन्जोपाइरिन
डाइलोक्साइड धयागु रसायन बुलुहँ
DNA या कपि कपिइ दुहाँ वना धिधि
चिना वइगु जुयाच्चन । थथे जुइवं
DNA या हेलिक्स बेक्क: जुया वनी ।
थथे बेक्क: जुइगु हेलिक्स थ:थवं हे मर्मत
यायेगु क्षमता DNA नाप दयाच्चनी ।
अर्थात भती भति बेक्क: जूसां व हेलिक्स
थ:थम्ह न तुं हाकनं न्हापाया स्वरुपय्
थ्यंक वइ । तर कार्सिनोजेनिक लोड
अप्व: जुया निरन्तर बेन्जोपाइरिन
डाइलोक्साइड जम्मा जुजुं वन धा:सा
बेक्क:गु हेलिक्सया कारण तन्तुकोषिकाया
ज्या यायेगु तौरतरीका हे पानावनी ।
थथे जुल कि क्यान्सरया विकास जुया
वनी ।

थुक्रिया अर्थ छु जुल धा:सा
छुयात:गु ला इलय् ब्यलय् जक नल
धा:सा उकिं लाकीगु असरयात थ:थम्हं
हे मर्मत यायेत DNA सक्षम जू । तर
न्हियान्तिथं नयेगु यात धा:सा DNA या
हेलिक्स बेक्क: जुया म्हाया कोषं कायेमा:गु
सुचं गलत जू वनी, अले कोषं
अप्राकृतिक ज्या याना हइ, गुकिंया लिच्च:
अस्वाभाविक विकास वा विनास जुइ ।
क्यान्सर धयागु व हे ख: ।

थथे पोलिसाइक्लिक हाइड्रोकार्बन
बेन्जोपाइरिन या असरय् लाइगु संभावना
दुपिनिगु बस्ति वना अध्ययन
यानास्वबलय् यक्वसिके क्यान्सरया लक्षण
दइच्चंगु खनेदत । अथे जुया थौंकन्हय
बेन्जोपाइरिनयात तस्कं विषाक्त
रसायनया धलखय् न्हापांगु १०गू ल्याखय्
दुतिनेधुंकुगु दु ।

अथे जू सा धात्थें छुयात:गु ला
नयेगु ग्यानापुसे हे च्वन नि धका: छित:
मतिइ वने फु । थ्व बारे नं अनुसन्धान
जूगु दु ।

पोलिसाइक्लिक हाइड्रोकार्बन
बेन्जोपाइरिन नयेगु नसा व कुँ निताय्
नं दइगु जुयाच्चन । नसाय्
ल्वाकज्यानाच्चंगु बेन्जोपाइरिन सिबे कुँ
मार्फत म्हाय् दुहाँ वनीगु बेन्जोपाइरिन
या असर तस्कं लाइगु जुयाच्चन । थ्व
कुँ धयागु ला छुइबलय् पिहाँ वइगु कुँ
ख: । थ्व कुँ या न्ह्य:ने च्वनीपिन्त
बेन्जोपाइरिनं तप्यंक असर लाकीगु
जुयाच्चन । क्वयेक छुयात:गु ला
नइम्हसित सिबे क्वयेक ला छुइम्हसित
थ्व बेन्जोपाइरिनया असर अप्व: लाइगु
जुयाच्चन ।

अथे हे मेगु ग्यानापुगु रसायन
नाइट्रोसमाइन ख: । ह्यङ्गवा: वा कोइलाय्
ला छुया क्वलकि थ्व रसायनय् हिलिइ ।
थ्व रसायनया कारण ट्यूमर जुइय: ।
कथहं

किपूया न्यामासिमाय् नेपालभाषा एकेडेमिया प्राज्ञ सभा क्वचाल

ज्वजलपा वा:पौ/

किपू न.पा. वडा नं.२ न्यामसिमाय् च्वंगु नेपालभाषा एकेडेमिया भिन्ध्यक्वःगु दै मुँज्या म्हिगः शनिवाः क्वचाल । एकेडेमिया चान्सलर चित्तरञ्जन 'नेपाली'या सभा नायसुइ जूगु उगु मुँज्याया मूपाहाँ किपू नगर पालिकाया मेयर रमेश महर्जन, विशिष्ट पाहाँ संरक्षक सत्यमोहन जोशी, विशेष पाहाँ किपू नगर पालिकाया उपमेयर सरस्वती खड्का व पाहाँ वडा नं.२ या वडाध्यक्ष रमेश मान डंगोल जुयादीगु खः । किपू नगर पालिकाया मेयर, उपमेयर व

वडा नं.२ या वडाध्यक्षयात स्वामालं क्वखाय्का सम्मान यागु खः ।

भाइस चान्सलर यज्ञरत्न धाख्वाःनं लसकुस न्वचू वियादीगु उगु ज्याभवलय् विशिष्ट पाहाँ सत्य मोहन जोशीं नेपालभाषा एकेडेमिया स्थापनानिसं कयाः थौंतकया बारे छत्वाःचा खँ तयादील । नेपालभाषा एकेडेमि नेवाःतय्गु जक मखु । थ्व देशया हे गौरवया खँ खः धयादिल ।

थःगु नुगः खँतय्गु भवलय् मेयर रमेश महर्जन धयादिल, “जनस्तरं नीस्वनातःगु नेपालभाषा एकेडेमि किपूली

पलिस्था जुयाच्चंगु किपूमितय्गु नितिं गौरवया विषय खः । थनं नेपालभाषा आन्दोलनय् न्हार्पानिसं लगय् जुयाच्चनागु खः । नियम अनुसार नगरपालिकां नेपालभाषा एकेडेमियात गुगु कथं ग्वाहालि यायेफइ, ग्वाहालि यायेत तयार दु । नेपालभाषा एकेडेमि भाषा, संस्कृति सम्पदाया बारे अनुसन्धानात्मक सफू च्वया पिकाय्गु खःसा ग्वाहालि यायेत नगरपालिका तयार दु धयादिल ।

उपमेयर सरस्वती खड्कां भाषा धइगु देय्या तिसा खः । देसय् ल्हाइगु फुक्क भाषाया विकास जुइमाः । नेपालभाषा



नेपाःया पुलांगु भाषा खः । उकिं थुकियात संरक्षण यायेमाः । नेपालभाषा जक मखु तामांग भाषा व मेमेगु भाषाया नं विकास

याना यंके फय्माः । थुकिया नितिं फुगु चाःगु ग्वाहालि यायेत किपू नगरपालिका तयार दु धयादिल ।

प्राज्ञ प्रेमशान्ति तुलाधरं सुभाय् न्वचू वियादीगु खः । चान्सलर चित्तरञ्जन नेपाली थःगु नुगः खँ तयाः सभा क्वचाय्का दिल ।

बाहिरी चक्रपथया नितिं जग्गा अधिग्रहण ज्या न्ह्यात



बाहिरीचक्रपथ निर्माणया नितिं जग्गा अधिग्रहणया ज्या न्ह्यागु दु । बाहिरी चक्रपथ स्विनिगःया सहरीकरण व ट्राफिक जामयात व्यवस्थित याइगु नीति कथं यायेत्यंगु खः । न्हापांगु खण्डय् सतुङ्गलं निसं चोभार तक ६ दशमलव ६ किलोमिटर चक्रपथ निर्माण याइगु बुखँ बिहिवाःया गोरखापत्रय् च्वयातःगु दु । जग्गा अधिग्रहणया नितिं माःगु ज्या पूवने धुकुगु न्हापांगु खण्डय् १४ हजार सात सय जग्गाधनीया सात हजार आठ सय रोपनी जग्गा अधिग्रहण याइगु खँ न्ह्यथनातःगु दु । सरकार जेठ १५ गते जग्गा अधिग्रहण सूचं राजपत्रय् प्रकाशित याये धुकुगु दुसा पुवकं चक्रपथ निर्माणया नितिं विस्तृत परियोजना प्रतिवेदन डीपीआर तयार जुइ धुकुगु व अधिग्रहणया ज्या थ्व हे वाः निसं न्ह्याइगु जुगु दु । जग्गा अधिग्रहण लिपा उपभोक्ता समिति गठन यानाः निर्माण कार्य न्ह्याकीगु जुगु दु ।

चक्रपथ निर्माणया नितिं सडकया निथासं जग्गा एकीकरण प्रक्रियामार्फत २५०, २५० मिटर जग्गा दइगु, थ्व प्रक्रिया पाखें जग्गा प्राप्त यायेबलय् सु नं विस्थापित मजुइगु व सरकार जग्गाया मुआब्जा विइ म्वालिगु खँ न्ह्यथनातःगु दु । जग्गा एकीकरण ज्यायात सहज यायेत उगु खण्डयात ६ गू इलाकाय् ब्यथलातःगु दुसा प्रत्येक इलाकायात थीथी ब्लक व प्रत्येक ब्लकयात थीथी त्वाल्य विभाजन याःगु खः । थुगु लागाय् ३८ गू ब्लक व ५५६ गू टोल प्रस्ताव याःगु दु । प्रत्येक इलाकाया चक्रपथया लम्बाइ करिव एक किलोमिटर जुइ । थुगु लागाय् किपू व चन्द्रागिरी नगरपालिका लाःगु दु । अथे हे घडेरीया न्यूनतम २० फिट व अधिकतम ५० फिट दइगु जग्गाधनी दामासाहीया आधार य् जग्गा काये दइगु खँ न्ह्यथनातःगु दु । ‘ल्यान्डपुलिड’ सिद्धान्तया आधारय् जग्गा एकीकृत यायेत्यंगु खःसा उकियात विकास यानाः इनीगु जुगुलिं सु नं विस्थापित मजुइगु फुक्कसित न्यायोचित वितरण जुइगु खँ धाःगु दु । बाहिरी चक्रपथ यें नं ३५ दशमलव आठ किलोमिटर, यलय् १५ दशमलव आठ किलोमिटर व खपय् २१ दशमलव पाँच किलोमिटर दूरी लायेत्यंगु खः । काठमाडौंलय् बाहिरी चक्रपथ चोभार, गाम्चा, सतुङ्गल, नैकाप, पुरानो भञ्ज्याङ, सीतापाइला, नागार्जुन डाँडा, नेपालटार, गोङ्गु, टोखागाँउ, चपली, कपन, जगडोल, सन्डोल व थलिडाँछीयात स्वायेत्यंगु खः । अथे हे यलया लुभु, सिद्धिपुर, हरिसिद्धि, ठैव, धापाखेल, ठेचो, छम्पी, बुइमती व खोकनायात स्वाये त्यंगु खः । खपया चाँगुनारायण, दुवाकोट, भौखेल, छालिङ, बागेश्वरी, सुडाल, ताथली, चितापोल, भक्तपुर, कटुन्जे, मध्यपुर नगरपालिका, दधिकोट व सिरुटारयात चक्रपथ स्वायेत्यंगु खः ।

चन्द्रागिरी नपाय् पुलांगु नां छ्यलेत ज्ञापन पौ लःल्हात

चन्द्रागिरी नगरपालिका वडा ल्याः १० व ११ य् अनया स्थानीय भिन्धः पासा पुचःपाखें बुधवाः ज्ञापन पौ लःल्हाःगु दु । उगु पुचलं अनया स्थानीय लागाय् सदियौनिसं हना वयाच्चंगु व छ्यलाः वयाच्चंगु स्थानीय थाय् बाय्या स्थानीय नां हे फुक्क थासय् छ्यलेत इनाप यासं उगु ज्ञापन पौ लःल्हाःगु खः ।

थौकन्हय् नेवाः वस्ती व नेवाः लागा दुने गैरनेवाःपिं च्वंवयाः इमिसं थः यत्थें उगु थाय्या नां तःगु व पुलांगु ऐतिहासिक नेवाः नांयात हाकुतिना छ्वःगुलिं सचेत जुया भिन्धः पासा पुचलं चन्द्रागिरी नगरपालिका वडा ल्याः १० व ११ या फुक्क थासय् तनाः वनाच्चंगु पुलांगु नां हे छ्यलेमाः धैगु इनाप यासं नवनिर्वाचित जनप्रतिनिधिपिन्त उगु ज्ञापन पौ लःल्हाःगु खः । थौ कन्हय् अनया ‘पँचा बाली’यात ‘धवलागिरी आवास क्षेत्र’ नां तयाः वय् वय् यानाच्चंगु दुसा ‘भाजं बुं’यात ‘अमर वस्ती’ नां तयाः पुलांगु नां तंकेधुंकूगु दु ।

इनाप

**ज्यापु समुदायया प्रतिस्थित व्यक्तित्वतय्गु सफू पिकाय्गु नितिं
क्वय् न्ह्यथनाकथंया विधाय् दुध्याःपिं व्यक्तिपिसं थःथःगु
बायोदाता (C.V) इलय् हे बियादीत इनाप यानाच्चना ।**

१. मन्त्री, २. सभासद ३. राजदूत, वाणिज्यदुत, कन्सुलर, ४. पि. एच. डि. डाक्टर ५. एम.बि.बि.एस डाक्टर, बि.ई नर्सिंग, डेन्टिस्ट, फर्मासेष्ट, ६. बि.ई. इन्जिनियर, ७. प्राध्यापक क) स्कूल (माष्टर डिग्री) ख) विश्वविद्यालय ग) चार्टर्ड एकाउन्टेन्ट, लेखा परिक्षक (माष्टर डिग्री) ९. न्यायाधीश सिनियर अधिवक्ता, १०. पाइलट, ११. सेकेण्ड क्लास अफिसर, नेपाल सरकार व वित्ति संघ संस्थानया क) जि.एम. ख) सि.ई.ओ. ग) सेकेण्ड क्लास अफिसर, १२. फाइन आर्ट, १३. कलाकार, १४. खेलाडी १५. उच्चपदय् च्वना समाजसेवा, १६. उच्चपदय् च्वनाः विभिन्न विधाय् ज्यायाय् धुंकूपिं

स्वापूया निति

नजरराम महर्जन

निखासी, न्हूबजाः, किपू-१०

फोन नं. ९८४१४०१०७७

नेपालभाषा ब्वंकेगु नितिं भिंतुना पौ लःल्हात

नेवा: बस्ती नेवा: स्कूल अभियानया ग्वसालय् यल महानगर दुनेया फुक्कं नीजि, गुथि व सरकारी स्कूलय नेपालभाषा ब्वंकेत इनाप यासें यलया मेयर चिरिबाबु महर्जन व उपमेयर गीता सत्यालपिन्त भिंतुना पौ लःल्हायेगु ज्या जुल ।

नेपालभाषा दुध्या:गु थीथी स्कूलसिं यलया भाषिक संस्थात दुध्या:गु उगु पुचल मेयर व उपमेयरपिन्त भिंतुना पौ लःल्हाना: हनेगु ज्या या:गु खः । वर्तमान संविधानय् माध्यम कथं माभासं ब्वंकेदइगु अधिकार बियात:गु दु । अथेहे, सरकार या पाठ्यक्रमय् नं विषय कथं अंग्रेजी व नेपाली विषयसिं मातृभाषा छगू नं ब्वंकेमा:गु प्रावधान दु । थुकियात कार्यान्वयन यांना: थुगु शैक्षिक दैनिसं हे सामुदायिक स्कूलय मेमेगु विषय सरह दरबन्दी लाका: नेपालभाषाया विषय ब्वंकेगु नापं आवश्यक थासय् नेपालभाषायात माध्यम भाषा कथं नं ब्वंकेत इनाप या:गु दु । माभासं ब्वनेगु मस्तयगु नैसर्गिक अधिकार जक मखु जनचाहना खः धासें थ्वहे चाहना कथं नीजि पहलय् १०१ गू स्कूलय नेपालभाषा ब्वंकाच्वंगु खं थुइकुसें स्थानीय तह, यल महानगरपालिका पहल स्कूलय नेपालभाषा ब्वंकेगु नीति न्ह्याका: यंकल धा:सा नेपालभाषा संरक्षणसिं मस्तसं थ:गु भासं शिक्षा ग्रहण यायेगु ह्वता: नं चूलाइगु खं न्ह्यथंगु खः ।

नेवा: बस्ती नेवा: स्कूल अभियानया कजि दिपक तुलाधरया नेतृत्वय् बंगु डेलिगेसन पुचलय् राज्य स्तरं हे यलया फुक्कं स्कूलय नेपालभाषा ब्वंकेमा:गु विचा: तसें नेवा: बस्ती नेवा: स्कूल यलया सुरेश प्रधान, नेपालभाषा मंका: खल: यलया नाय: ऋषि प्रसाद श्रेष्ठ, मंका: खल: यलया सल्लाहकार डा. पुष्पराज राजकर्णिकार, ज्यापु समाज यलया नाय: प्रेम महर्जन, भास्सरा मावि, यलया निर्देशक जीवन अवाले, यल नेवा: इंटरनेशनल स्कूलया प्रिन्सिपल ध्रुव प्रधान, रेणुका बज्राचार्य, नेपालभाषा केन्द्रिय विभागया पूर्व नाय: तुल्सीलाल सिं, भाषासेवी व कानून व्यवसायी किरण शाक्य, नेपालभाषा क्लब, यलया नकिं बिना महर्जन, माभाय् पुच: यलया नाय: हेरारत्न शाक्य, मातृभाषा शिक्षा अनुसन्धाता तोयानाथ भट्टराई, जेपि स्कूलया नेपालभाषा शिक्षिका रमिता बज्राचार्य, नेवा: देय् दबू यलया नाय: हेराकाजी महर्जन, मदर्स आरम स्कूल यलया प्रिन्सिपल दिल कुमारी महर्जन, अक्षेश्वर महाविहार संरक्षण समिति यलया राजेश शाक्य, नेपालभाषा न्हिपौ भीगु स्वनिग:या राजेन्द्र रञ्जित, नेपालभाषा स्यनेकने पुच:या सानुकाजी महर्जनपिन्सं ल्हाचिं तया: पौ लःल्हा:गु खः ।

पत्रकार रत्नकाजी

लूनिभा:या बा: मन्त

ज्वजलपा वा:पौ

देय् न्ह्यंकंया नेवा: पत्रकारतय्गु मंका:गु संगठन नेवा: पत्रकार राष्ट्रिय दबू येँ जिल्लाया न्वकू रत्नकाजी महर्जन 'लूनिभा:या' अबु सिद्धिबहादुर महर्जन बिहिवार चान्हय् १२:३० ता इलय् मन्त ।

मदुम्ह सिद्धिबहादुर महर्जन ७८ दँया खःसा छुं दिं न्ह्यःनिसें दमया ल्वय् जुया: काठमाडौं मेडिकल हस्पिटलय् वास: याकात:गु खः ।

मदुम्ह महर्जनया अन्तिम दाहसंस्कार बिहिवार सुथय् ८ ता इलय्



येँया ल्हुतिइ जुइधुकूगु दु । दिपय् श्रद्धाञ्जली प्वंकेगु नितिं नेवा: पत्रकार राष्ट्रिय दबूया केन्द्रीय नेतृत्वनिसें जिल्लाया नेतृत्व नापं भाषा ख्य:या थीथी व्यक्तित्वपिं नं सहभागी जुयादीगु खः । पत्रकार महर्जनया मदुम्ह अबु महर्जनया जहानलिसं स्वम्ह काय् व निम्ह म्हाया दी ।



पत्रकार नविन महर्जनया लुमन्ति विशेष ल्या: कथं असार २१ गतेया कीर्तिपुर सन्देश साप्ताहिक पिथनेगु जूगुलिं वय्क:या लुमन्तिइ च्वसू च्वयाहयादीत इनाप यानाच्वना ।

पत्रकार नविन महर्जनको सम्झनामा विशेष अंक असार २१ गते १३ औं दिनको पुण्य तिथिमा कीर्तिपुर सन्देश साप्ताहिक प्रकाशित गर्ने भएकोले उहाँको सम्झनामा लेख रचना पठाउनुहुन अनुरोध गर्दछौं



कीर्तिपुर सन्देश साप्ताहिक

फोन नं.: ४३३३००७

kirtipur_sandesh@live.com

तपाईंको टोलमा भएका घटना कीर्तिपुरको समाचार बनाउने हो भने तपाईं एक कल फोन गर्नुस् हामी तपाईंको टोलको समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

ज्वजलपा वा:पतिइ छिगू चिनाखं/बाखं/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसं

सकलसिगु मंका: स:



ज्ञजलपा वा:पौ

किपुलिं पिदनाच्वंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसं

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्याकू: निखासी त्वा: किपू नपा-३ फोन ल्या: ४३३३००७,
९८०८६२६४२० ई-मेल : kirtipur_sandesh@live.com

साहित्य उपन्यास – जन्ति न्ह्यात

च्वमि— मदन गोपाल प्रधान “क्वाःघासा”
कथहं
“किपाःनि ज्वना हुँ अले लिपा जातःया नक्कल धाल धाःसा काः वा धकाः मचाया बौम्हं धया दिइगुलिं किपाः नि ज्वना वयागु । आःछिं धयाःदिसेंलि जातःया नक्कल नं माल धकाः कया हये । मज्यूला, मनतता ?”
“ज्यू । वरु याकनं दःसा मेगु ज्या खँ नं न्ह्याके दै । किपाः स्वयांला गाइ मखु थें । छकः म्ह नं स्वये हे माली ।”
“अय्सा म्ह स्वयेगु नि याये मालि । किपाःला स्वया दिइ हे धुंकल । खतु किपाय् स्वयाःनं मन् भ्जन बांला । म्ह हे स्वया दीसा छिकपिनिनं मन च्वनि । लिपा थथे अथे धकाः हाला च्वने मालिइ नं मखु । जिं स्वयेवलय् म्ह स्वयेगु नि खँ छुइ मालि थें च्वं ।”
“छिं धयाचुगु नं पायेछि हे जू । म्ह स्वये धुंकाः जातः क्यने माली । मज्यूला, मयजु ?”
“छिं धाःथे । जातः तुके धुंकाः म्ह स्वःसां ज्यू । म्ह स्वये धुंकाः जातः क्यने याना दिइसां ज्यू । मनततां गथे धयादिल अथे हे जुइ । म्ह स्वयेगु निं न्हापां यानादिइगु खःसा मचाया मांवौपिसं गबलय् धयादिइ अवलय्यागु खबर ज्वना वये । आःयात वना हे छवये । दिसैं, मनतता ।”

थुलिधयाः मयजु दन । मनमाया नं दन । निम्हं कोथां पिहाँ वन । कुने तक मयजुयात तयाः खापाखिपा तिनाः मनमाया यहाँ वल । कोथाय् वन । चक्ति घने लाना च्वंगु किपाः कयाः हानं छकः स्वत । अले थःगु फुङ्ग तलय् स्वचाकाः कप, रिकापि व किस्ति ज्वनाः कोथां पिहाँ वल । बैगलय् वने त्यंम्ह मनमाया श्रीया कोथाय् दुहाँ वन । प्वंगु कप कयाः मिखा तिसिनाः लासा प्वालय् ग्वारा तुला च्वंम्ह श्रीयात याकनं दना ख्वाः स्यू हुँ धकाः धयाः तलय् थहाँ वन ।

देनेत त्वःताः फुङ्ग तलय् तःगु नाडी घडी कयाः स्वत । चाताः जुया फिंन्यागू मिनट वने धुंकल । श्री वाथक्क दन । फाङ्गा थ्यानाः खाताया लिक्वय् तल । लासा छक सुचुकल । तःकुगु ख्वाःहुसा छकू पाछात । दाहिं खायेत माःगु ज्वलं अले ब्रश, पेष्ट व साभों ज्वनाः कुने हितिइ वन ।

ब्रश ब्रुश याना दाहिं खाये सिधयेकाः म्वः ल्हुयाः च्वंम्ह श्री पिजःया बारये थीथी खँत वायेकाः च्वन । न्हापा पिजः वया थःम्ह यज्जु । आः कर्किया मिसा । न्हापा यःत्यःया खँ ब्याः । आः औपचारिकता जक व्याक्रेगु जुइ । न्हापा स्वयेगु मिखा आः कनाः जक च्वनेगु जुइ । न्हापा नवायेगु पहः आः कुतः याःसनं वइमखुत । न्हापा कुमारी आः मिसा वनं भाःत मदयेधुंकूम्ह । न्हापाः व आः अवश्य हे पाइ । अय्जूगुलिं पिजःयात छकः नापलायेगु वया तःधंगु हे मनसुभा । तर नापलायेगु गथे ? आदि धयागु खं वायेकाः च्वंम्ह श्री म्वःल्हुइ धुंकाः तले वन । लं फित सँ छयन । स्वये मगाःपहलं न्हाय्कं छकः हान स्वत । कमिजया गःतां ज्याछिंकुकं तले बैगलय् वन । तले थहाँ वना च्वंम्ह श्री पिजःयात नाप हे लायेगु बिचाः यात ।

श्री थहाँ वःगु खनाः मनमाया भुतू ज्यां दनाः कःसि वनाः ल्हाः सिल । प्याःगु ल्हाः पर्सि च्वथं हु हुं “जि कुने छकः वना वये ।” धकाः क्वहाँ वन । कःसिइ वनाः श्री छचाखेरं मिखा छकः ब्वयेकल । उखे थुखे मिखा ब्वयेकाः च्वंम्ह श्री भ्कसंग वन । छुं तंगु थें तायेकल । लिमलाः फमलाः ब्वयाः च्वंगु मिखा ध्यनाच्च गुँया च्वकाय् वनाः दित । ध्यनाच्च गुँया च्वकाय् लाक्क भराय् माःगु सिमा छमा दुगु मचा बलय् वं व सिमा गयाः सर्गः थिइगु मनं तुंगु । तर अवलय् व नाकं हे चिकिचाधिकःगुलिं व गुँ गयेगु आँत हे याये मफु । लिपा तःधिकः जुसेंलि व सिमा गयाः नं सर्गः थिइ फइमखुगु वास्तविकता

थुसेंलि छन्हु व सिमा गयाः खन् दुथाय्तक याने याने थिंक स्वयेगु वया बिचाः । तर आःवःथा व थासय् वं न्हापा खँगु सिमा लुइकेमफत । व थासय् व सिमा हे मदये धुंकल ।

मनमाया थहाँ वःगु स्वाने सः तायेदत । न्हापा खनागु सिमा आः मखनाः वातां स्वयाः च्वंगु मिखां कःसि पौलय् उखे थुखे थुखें उखे चा चा हिलाः छम्हेसिनं मेम्हेसित लिनाः भुरुक्क भुरुक्क ब्वयाः च्वीपिं वखुँ छज्वःयात खंकल । व हे वखुँतय्त स्वयाः सुंक दना च्वन ।

भ्वतं भुनाः तःगु प्यकुं लाःगु छगू ज्वनाः मनमाया थहाँ वल । कःसिइ दना च्वंम्ह श्रीया न्ह्यने व प्यकुंलाःगु भ्वतं भुनाः तःगु वस्तु न्ह्यः ब्वयाः मनमायां धाल, “थ्व छकः स्वः ।”

मामं ब्यूगु वस्तु काल । भुनाःतःगु भ्वं लिकाल । यौवनं जाःम्ह छम्ह त्यासेया किपाः श्रीया ल्हाःतय् । किपाः छकः बांलाक स्वयाः श्री धाल, “मिसा मचाला तसकं हे बांला । थ्व सु, मां ?”

“छन्त यःला कि मयः ?” मांम्हेसिया मनया खँ श्रीं सिइकल । इहिपाया खँ छुइ त्यंगु धकाः श्रीं थुइकल । किपाः खतं मिसामचायात खिने थाय् छुं हे मदु । बां हे लाः । धाथें धायेगु हे खःसा छगू मनं वं व किपाय् च्वंम्ह मिसा मचायात येकल । तर मेगु मनय् अन्तर्व्दन्द जुइकाः च्वंम्ह श्री थथे हे धकाः त्याजिक्क लिसः विइ मफया खँ हिके भनं धाल, “मिसा मचा ला वांमला मजु । जितः ला यः । तर न्हाय् फ्वः मुस्यःग्वाराथें च्वंसां मांयात यः ला ?”

छं धायेवं मुस्यःग्वाराथें च्वनिका ।” भचा तं म्वः पहलं श्रीया ल्हातय् च्वंगु किपाः छकः स्वयाः धाल, “थःयागु छाइसे सुलुक्क वंगु न्हाय्यात मुस्यःग्वारा थें च्वं धका धाइम्ह । अपायधिकः जुइ धुंकल, ह्याउँगु नं स्यूगु मखु वाउँगु नं स्यूगु मखु । छं थःगु ख्वाः गबलें न्हाय्कनय् स्वःला ?”

मनमायाया सलय् तं थ्वःगु तयो दु । तर मांया तं ला खःनि । उघ्निमय् गन वं गन वं जुइगु मांया तं मर्खपिं मस्यूपिं सु मचात जक दइ? मनमाया नं ला छम्ह मां खः । श्री नं छम्ह मचा खः, मां मनमायाया । थः मांया तमय् ममता नं दु धकाः श्री जक मस्यूगु नं मखु । तर मामं तःगु न्ह्यसःया लिसलय् थथे हे धकाः धायेत श्री भचा बिचाः हे याये माःगु तायेका खँ त्वपुइ भनं धाल, “जा नये मत्यःनि ला, मां ?”

“त्यल” धयाः मनमाया भुतुलिइ वन । श्री नं ल्हाः सिलाः फ्यतुत । उखे मनमाया जा ताना च्वन । थुखे श्रीं थःगु मनय् खँ तानाच्वन ।

मांम्हेसिया नुगलय् स्याइगु छुं हे यायेगु बिचाः वया मदु । बिचाः नं वं गथे याये फइ? मां जक जुयां मगानाः बौया कर्तव्य नं व हे मनमायां याःगु श्रीं त्वःमंके फैगु मखु । अय्धयां हानं दकसिवे तःधंगु खँ ला मनमाया श्रीया मां खः । हानं मनमायां थः काय्या लागि मिसा मचा नं छुं हे खँय् खिने थाय् दुम्ह मखु ।

“धाथें स्वः श्री, थथे अथे धकाः हाला च्वनेगु मखु । मिसा मचा बां हे लाः । ब्वनाः तःम्ह नं खः । मां बौपिं नं नां जाःपिं । इज्जत दुपिं खः ।” जा न्ह्यच्याका मनमायां धाल ।

बौ व्यु व्यु श्रीं थःमांया खँ न्यनाः च्वन । बौ विइ सिधयेकाः जा नल । मांम्हेसियागु खँय् थथे अथे धकाः छुं मघाः । सुंक जा नया च्वन । मनय् खँ नं ल्हाकाः च्वन । ननि मवा । श्रीया लिसः न्यनेगु उत्सुकताय् मनमाया न्ह्यनेसं भ्वातां दना च्वन । थः काय्या लिसः मदुगुलिं मनमायाया मनय् शंकां थाय् काल । श्रीं व मिसामचायात मयेकगु ला धया थें वया मनय् चिंक मिंकल । भचा दिक्क चाः पहलं सुंक दनातुं च्वन ।

“मांया नं भपिया दिसैं ।” दना च्वंम्ह मांम्हेसित स्वयाः श्रीं धाल । क्रमश

हलिं नेवाः गुथि किपू कचां किपुली याःगु “भिंके-ल्त्वने-न्हूधाः यायेनु”छयों तया चिनाखँ गोष्ठी ब्वंगु चिनाखँ छसिंकथं पिकया वनेगु तातुना थ्व चिनाखँ न्ह्यब्वयागु खः

४७.नेवाःवाद जिन्दावाद

अर्जुन नेपाःमि छुगां, किपू
१९३५ सालया तःभुखाय् त्वःमंके मफइकथं न्ह्यपुया धकिमय् स्वचानाच्वंगु दनि, लुमनेवं हे अक्क नं तुति खानावः म्ह खानावः अक्क धाये ग्यासे वः छक्कलं छथुं हे छुं छुं हे धाये मलावं छुं छुं याये मलावं ध्वारा धुररुं यानाब्यूगु व लू ल्वमंगु ला ख हे मखुनि त्वमंके फुगु ला ख हे मखुनि । अय् नं अक्क नं वयाच्वंगु दु व भुखाय्चा ख्याये भनं सातु कायेगु भनं थ्व धर्तिइ मिखां ख्वबि तिकिनंगु चूगु मखुनि दुखया स्याः क्वलाःगु अक्क नं दनि दुघाः, स्याः जुयाः चिचाय् दने मफयाः वाथावाथा कनाब्यूगु भुखातं ब्यूगु लू, बल्चाया वासं थन्थ्याये मफइच्वंगु भ्फाः थज्याःगु इलय् हे अक्क थिकेया भुखाचं क्वत्पू वइच्वन । भ्यातुयाच्वंगु थ्व वेलसं भ्रष्टाचार क्वबिकः वइच्वन । तःभुखातं ब्यूगु सास्ति ज्यंकेत धकाः वःगु न्हू संविधान आःतक फय्गं हे जुयाब्यूगु दु । मलम जुइमाःगु थ्व न्हूगु संविधान विख फगत् विख जुयाब्यूगु दु । धाथें संवैधानिक भुखाय् थ्व देशय् शासकतय्सं ब्वयेकाब्यूगु दु । गुगुं भुखाचं मचाय्क भ्कीगु (आदिवासि जनजाति) म्हसीका तंकाछ्ववयेत्यंगु दु । भ्कीगु अस्तित्व हुया छ्ववयेत्यंगु दु । थ्व ला भ्कन् यक्व हे आपत जुइत्यंगु दु । इलय् हे थ्व संवैधानिक भुखाचं हःगु सकस मज्यन धाःसा ज्यंके मफत धाःसा थनया लकस मसां नवइ । अकिं ल्त्वने माःगु आपालं ऐतिहासिक व पुरातात्विक सम्पदात दु थन भिंके माःगु आपालं आपाल धरोहरत दु थन अय् नं तवि मूखँ ला भ्कीगु नितिं संवैधानिक भुखाय् १९३५ सं स्यंकूगु भ्कीगु अधिकार भ्कीगु म्हसीका भ्कीगु नेवाः प्रदेश भिंकेया नितिं ल्त्वनेया नितिं

हलिं नेवाः गुथि किपू कचां किपुली याःगु “भिंके-ल्त्वने-न्हूधाः यायेनु”छयों तया चिनाखँ गोष्ठी ब्वंगु चिनाखँ छसिंकथं पिकया वनेगु तातुना थ्व चिनाखँ न्ह्यब्वयागु खः आः हे पलाः न्हूधाःया छिये त्यःगु दु । जय नेवाः परदेश धायेमाःगु दु । नेवाःवाद जिन्दावादया सः थ्वयेके माःगु दु ।

५०. बहत्तरया भुखाय्

सुभित्रा महर्जन, हँयगः, किपू
नब्बेसालय् भुखाय् ब्वःगु न्यनाः जक तयागु बहत्तर सालय् भुखाय् ब्वःगु थःम्हं हे अनुभव यानागु । नब्बे सालया भुखाचं यक्व मनूत सित हं बहत्तरय् ब्वःगु भुखाचं न्हापास्वया अप्पः सीगु । थुगुसिइया भुखाय् गुलि ग्यानापु द्वाङ्ग, दुङ्ग लि(भुखाय् ब्वइगु भुखाय् ब्वयाः वःमलाःगु छेंत ध्वाररर दुनाः वइगु । भुखाय् ब्वयाः मनूजक मखु वस्तु यक्व हे सीगु गुलिसिया मांबौ मन्त गुलिसिया काय्म्ह्याय् । स्वनिगलय् जक मखु भुखाय् स्वनिगःया पिने नं ब्वःगु मरुसतःजक मखु स्यंगु धरग्वारा क्वः दःगु ।

५१.आजु मवःनि

महन्त महर्जन सल्यांचा, किपू
वा वल फय् वल आजु मवःनि न्हूगु संविधान वल न्हूम्ह राष्ट्रपति, प्रधानमन्त्री वल न्हूम्ह सभामुख नं वल तर नेपाःमिपनि आजु मवःनि पुलांगु वाद दु न्हूगु छुं मदु थीथी बिचाः दु नेपाः दयेकेगु वाद मदु । भ्कीके छुं मदु ? लः दु, फय् दु, चा दु कला संस्कृति नं दु । बुद्ध नं दु, पशुपति नं दु अक्क सगरमाथा नं दु मन्त्री जुइपिं नं गःगः दु भ्कंगः लाइपिं यक्व दु । फुस्लुगु आश्वासन दु तर दयेकीपिं सुं मदु । प्रजातन्त्र वल लोकतन्त्र वल गनतन्त्र नं वल दक्वं वल तर नं नेपाःमिपनि आजु मवःनि । आसा याये छन्हु अवश्य आजु थ्यंकः वइतिनि । गुबलय् भ्भी दक्व वाद व विवाद त्वःता छर्पं जुयाः न्ह्यायेवलय् अवश्य भ्भी आजु थ्यंकः वइतिनि ।

नेवाः पत्रकार नविन महर्जन मन्त

ज्वजलपा वाःपौ

देयन्त्यकया नेवाः पत्रकार तयगु राष्ट्रिय संगठन नेवाः पत्रकार राष्ट्रिय दबूया दुजः नापं युवा पत्रकार नविन महर्जन ४९ दैय आकाभाकां मन्त । वयकः मदुगुलिं शनिवाः सुथय हे सिथं यंकेंगु ज्या जुगु खः । किपूया दीखुइ सिथं यंकेंगु इलय किपूया समाजसेवी, बुद्धिजीवी, पत्रकार निसें थीथी ख्यःयापि सलसःम्ह मन्त । मन्त अन्तिम श्रद्धाञ्जलीया प्वंकुसं छगु मिनेट मौन धारणा याना श्रद्धाञ्जली नं प्वंकादीगु खः । उगु इलय नेकपा माओवादी केन्द्रया प्रवक्ता पम्फा भुसाल व सांसद रुपा महर्जनं कम्प्युनिष्ट पार्टीया ईचा मुगः दुगु हयाउँगु ध्वाचं फायेकादीगु खः । तत्कलिन अवस्थाय जनमोर्चाया सांस्कृतिक कवलय च्वना ज्या यानादीम्ह वयकः लिपांगु इलय माओवादी केन्द्रया कार्यकर्ता कथं नं ज्या याना वयाच्वनादीम्ह खः ।

अबु हर्ष नारायण महर्जन व मां अष्टमाया महर्जनया चीधिकःम्ह काय्या रुपय २०२५ सालया माघ महिनाय जन्म

जुयादीम्ह किपू नगरपालिका १ वडा बाकुननी त्वालय च्वनादीम्ह ल्यायम्हम्ह खेलकुद पत्रकारलिसें उज्ज्वल शिशु निकेतनया शिक्षकलिसें किपूया छम्ह नांजाःम्ह संगीतकःमि नवीन महर्जन शुक्रवाः बहनी आकाभाकां मदुगु खः । शुक्रवाः थ्यंमथ्यं बहनी ७ ता इलय यैया वीर अस्पतालय मस्तिष्कया स्नायु स्वास्थ्य उपचार या भवलय वयकः मदुगु खः । थ्यंमथ्यं स्वंगू दशक न्थ्यः किपूया इन्द्रेणी सांस्कृतिक समाज (इसास)पाखें छम्ह वाद्यवादक जुयाः संगीत खलय पिलू भाःम्ह मदुम्ह नवीन महर्जन नेपालभाषा व खस भाषाया यानाः आपालं म्येया सिर्जना यानादीगु दुसा वयकलं थ्यंमथ्यं न्याचाःति थःगु संगीतय म्येचाः पिथनादीगु दु । लिपांगु इलय वयकः सुगम संगीत पुचःया संरक्षक जुया नं ज्या यानादीगु खः । मदुम्ह नवीन महर्जन छम्ह किपूया सक्रिय नेपालभाषाया कार्यकर्ता नं खःसा वयकलं नेपालभाषा एकेडेमि न्थ्याकाः वयाच्वंगु नेवाः एफएमया ज्याभवः न्थ्याकामि जुया नं ज्या यानादी



धुकल । किपू नगरपालिका १० वडाया गुनपौ भजन खलःया छम्ह दुजः मदुम्ह नवीन महर्जन न्हापा किपुलिं पिदनीगु लकस वाःपौनिसें खेलकुद सम्बन्धी थीथी च्वसू च्वयाः वयाच्वनादीम्ह खःसा वयकलं थौं कन्हय किपुली पिदनाच्वंगु ज्वजलपा वाःपौ व कीर्तिपुर सन्देश साप्ताहिकय नं खेलकुद सम्बन्धी च्वसूत च्वयाः वयाच्वनादीम्ह खः । किपूया पत्रकारतयत बिइगु ज्ञान पत्रकारिता सिरपाः तक त्याकादी धुकूम्ह वयकः नविन महर्जन युवा पत्रकार खः । मदुम्ह किपूया खेलकुद पत्रकार, शिक्षकलिसें संगीतकःमि नवीन महर्जनया जहानलिसें छम्ह काय व छम्ह म्थ्याय दी ।



बिचाः हायेकाः

बुदिं : बि.सं.
२००० असार
१८ गते



मदुम्ह जगतबहादुर श्रेष्ठ

मदुगु दिं : बि.सं.
२०७४ असार
१ गते



थुगु खड्ग भवानी बचत तथा ऋण सहकारी संस्था लि.या सेयर सदस्य जगतबहादुर श्रेष्ठ वंगु ने.सं ११३७ तछलागा ६ बिहिवाः (२०७४। ०३। ०९) खुन्हु आकाभाकां मदुगुलिं मदुम्हेसिया आत्माया चीरशान्तिया कामना यासैं सोकय लानाच्वपिं सकल छेंजःपिन्सं धैर्यधारण याये फयेमा धकाः कामना यानाच्वना ।

खड्ग भवानी बचत तथा ऋण सहकारी संस्था लि.

किपू - ९, अमलिस (नयाँबजार)

बिचाः हायेका

बुदिं : बि.सं.
२०२५ साल
माघ



मदुम्ह नविन महर्जन

मदुगु दिं : बि.सं.
२०७४ असार
९ गते



नेवाः पत्रकार राष्ट्रिय दबूया दुजः नापं किपूया युवा पत्रकार नविन महर्जन (बाकुननि किपू -९) वंगु ने.सं ११३७ तछलागा चःहे शुक्रवाः (२०७४। ०३। ०९) खुन्हु आकाभाकां मदुगुलिं मदुम्हेसिया आत्माया चीर शान्तिया कामना यासैं सोकय लानाच्वपिं सकल छेंजःपिन्सं नुगः चिइ फयेमा धकाः कामना यानाच्वना ।

श्रीकृष्ण महर्जन

केन्द्रीय नायः, नेवाः पत्रकार राष्ट्रिय दबू

नजरराम महर्जन

केन्द्रीय दुजः नेवाः पत्रकार राष्ट्रिय दबू